

## Messadi pertuccont contribuziun per il pumtrack Fontanivas, Glion

Preziada presidenta dil parlament  
Stimadas parlamentarias, stimai parlamentararis

L'uniun «a Glion», la quala ei vegnida fundada igl atun 2021, ha la finamira da planisar e realisar projects ed ideas innovativas els secturs da sport, cultura e dil temps liber. In project che stat specialmein a cor all'uniun e vegn discussa gia dapi onns ei la realisaziun d'in pumtrack a Glion. Il pumtrack a Fontanivas Glion duei esser ina zona da sentupada per giuven e vegl. In liug nua ch'ins sa far activitads sportivas ni semplamein observar la truscha multifara. Il liug a Fontanivas ei predestinaus per in pumtrack cun quei che l'infrastructura existenta sco il bogn aviert, il plaz da ballapei ed il plaz da tennis vegn cumplettada a moda raschuneivla. Per saver realisar il project suttametta la supra-sonza communal al parlament communal l'approbaziun d'ina contribuziun da 100'000 francs.

### Situaziun da partenza e descripsiun dil project


Pumtracks ein ton plazzas da giug sco era indrezs da trenament per quels che semovan cun velo, skateboard ni trottinet sin tut ils scalems da habilitad. Tracks asfaltai ein hotspots per tuttas sorts bikers ch'enqueran in'aventura sportiva plein divertiment. Habilitads fundamentalas e diversas sco prender si slontsch, megliurar la pesentincla e la spertadad san vegnir trenadas. Cunquei ch'ils utilisaders vegnan cul temps megliers, ein il tracks concepì aschia ch'ils bikers san megliurar lur habilitads entras alzar la spertadad ed il grad da difficultad dils skills, senza che la construcziun sto vegnir modificada. In obstachel, atras il qual in affon da tschun onns sa rullar, sa vegnir nezegiaus d'in profi sco schanza da segls. Ultra da quei ein pumtracks impurtonts e sempels loghens da sentupada.

La projectaziun e realisaziun succeda entras la fatschenta Velosolutions da Flem, la quala ei ina dallas purschidas dominantas internaziunalas da pumtracks asfaltai.



Il pumtrack d'asfalt planisau ei adattaus per tuttas sorts da rodas e cundiziuns dall'aura. El drova pauc manteniment, ei da liunga durada e porscha ina surfatscha uliva che tegn bein cun ina fetg bassa resistenza da rullar.

Il pumtrack Fontanivas a Glion, vegness realisau agl ur dil plaz da trenament da ballapei, en direcziun dalla Via Fontanivas e dil bogn aviert. La parcella 472 ei en possess dalla vischnaunca e sesanfla ella zona per edifecis e stabiliments publics. Aschia ei la conformitad dalla zona dada.



## Avantatgs d'in pumtrack

Tenor la plattafuorma d'informaziun digl uffeci da sanadad Grischun per la promoziun dalla sanadad e prevenziun:

- Il sport il pli popular dils svizzers – il pumtrack porscha trenament dalla tecnica e segirtad da semover cun velo.
- Attrattiv per la vischnaunca – in'infrastructura moderna e multifara augmenta l'attractivdad d'ina vischnaunca per habitonts e potenzials nievdomiciliai.
- Plascher da semover – pumtracks scoleschan la coordinaziun e promovon el medem mument la cundiziun fisica.
- Pumtracks schanegian las resursas – els ein gia realisabels sin surfatschas da 250 m<sup>2</sup> ed ein era adattai per surfatschas restontas.
- Multifuncziunalitad – igl ei pusseivel da far diever dil pumtrack cun biars urdeins da sport (velo, inline-skates, skateboards etc.).
- Pumtracks ein per tuts – els ein per ina vasta gruppa en mira e san vegnir integrai bein en in'ura da gimnastica dalla scola.
- Loghens da sentupada – grazia alla gruppa en mira varionta daventan pumtracks ina zona da sentupada per l'entira vischnaunca.
- Loghens silenzius – far diever dil pumtrack caschuna strusch canera ed ei perquei era acceptaus ella vischinonza.
- Pumtracks ein segirs – els vegnan classificai dil post da consultaziun svizzer per la prevenziun d'accidents (PPA) sin il scalem da difficultad «blau» (sempel).
- In product svizzer – la fatschenta svizra Velosolutions da Flem drova materialias localas per construir pumtracks e collaborescha cun furniturs svizzers.

## Cuosts

Ilis cuosts per la construcziun dil pumptrack secumponan tenor la calculaziun dils cuosts dallas suandontas posiziuns:

<b>posiziun</b>	<b>cuosts</b>
allontanament terren sura	CHF 9'910.00
construcziun ruosna d'aua da sfundrada	CHF 2'770.00
realisaziun format nunelaborau	CHF 55'950.00
installaziun UG 0/45	CHF 52'600.00
Integraziun terren sura	CHF 4'150.00
integraziun cuvrida	CHF 66'720.00
planaziun groppa terren sura	CHF 1'540.00
planaziun groppa terren sura	CHF 2'580.00
semnar	CHF 1'690.00
albiert e proviant, pauschal	CHF 14'120.00
planisaziun, pauschal	CHF 27'560.00
reserva	CHF 5'000.00
7.7 % taglia sin plivalur	CHF 18'410.00
<b>total extras</b>	<b>CHF 263'000.00</b>

## Finanziaziun

L'uniun «a Glion» fa avanzar cun passiu il project dil pumptrack Fontanivas a Glion e vul financiar tal per gronda part cun mieds da tiarzs. La vischnaunca duei separticipar cun ina contribuziun da 100'000 francs ni maximalmein 40 pertschien dallas spensas d'investiziuns imputablas. Quei corrispunda era allas finamiras dalla nova lescha da sanadad e las pussevivadads per financiar implonts da sport tenor art. 8, la quala ei vegnida approbada dil parlament communal a caschun dalla sesida digl avrel 2022.

<b>finanziaziun</b>	
contribuziun vischnaunca llanz/Glion	CHF 100'000.00
fondo da sport Grischun sport	CHF 10'000.00
contribuziun club da velos Surselva	CHF 10'000.00
sponsurs privats e fatschentas	CHF 121'000.00
crowdfunding	CHF 22'000.00
<b>total entradas</b>	<b>CHF 263'000.00</b>

## Menaschi e manteniment

Tier il pumptrack setracta ei d'in indrez public ch'ei accessibels per tuts. Grazia al catram d'asfalt basegna igl indrez pauc manteniment. Il manteniment jamnil (tener schuber igl indrez) da ca. mars entochen november ei vegnius schazegiaus cun duas uras da lavur e duei vegnir prestaus dil survetsch tecnic. Tier pli grondas lavurs da tgira duei l'uniun «a Glion» vegnir integrada cun lavur voluntaria.

## Termins

Decisiun parlament communal	17 da matg 2022
Planisaziun pumptrack	zercladur 2022 – october 2022
construcziun pumptrack	avrel – zercladur 2023
menaschi pumptrack	naven dil fenadur 2023

## Proposta

Sin fundament dallas explicaziuns precedentas fa la suprastanza communal las suandontas propostas al parlament communal:

- d'entrar ella fatschenta;
- d'approbar ina contribuziun da 100'000 francs ni maximalmein 40 pertschien dils cuosts imputabels per la construcziun d'in pumptrack a Fontanivas, Glion.

*Ilanz/Glion, ils 26 d'avrel 2022*

*Suprastanza communal Ilanz/Glion*